

SPREMNOST ZA SPAŠAVANJE NA VODI

Prostor Bosne i Hercegovine je sve češće izložen udarima prirodnih i drugih nesreća koje veoma često imaju katastrofalne razmjere. Jedna od pojava koja u posljednjih desetak godina zabrinjava su i prolomi oblaka koji za posljedicu imaju nastanak bujica, plavljenje a kao propratnu pojavu i klizišta. Ovakve pojave su zabilježene i na prostoru općine Srebrenik 2001., 2005., 2010. i 2013.godine, kada su pogađani dijelovi općine. Ovakve pojave uvijek iznenade građane koji žive na pogođenim prostorima što povećava rizik od gubitka ljudskih života. U ovim poplavama je izgubljen jedan ljudski život, povrijeđena dva građanina i jedan spasilac a ukupno je izvedeno sedam akcija spašavanja. Općinska služba civilne zaštite je u proteklom periodu razvijala službe zaštite i spašavanja kako bi se što uspješnije suprotstavila prirodnim i drugim nesrećama. Praksa je pokazala da je



neophodno obučiti, opremiti i osposobiti ekipe za spašavanje na vodi pri Gorskoj službi spašavanja ali i Profesionalnoj vatrogasnoj jedinici Srebrenik što je bio i alarm da je došlo vrijeme da se organizirane i studioznije pristupi pripremi spasilaca za izazove poplava, odnosno bujičnih rijeka. Kako bi smo što spremnije dočekali predstojeće poplave, Općinska služba civilne zaštite je, u saradnji sa Klubom spasilaca „Gradina“ Srebrenik započela proces obuke za spašavanje na vodi.

Prvi uvjet za pohađanje obuke je da spasilac ima razvijene plivačke sposobnosti. Drugi uslov je posjedovanje čamca i odgovarajuće opreme. Pošto su ispunjena ova dva uslova, u dane 17., 20. i 21. Jula 2013.godine je izvedena obuka pripadnika Gorske službe spašavanja Srebrenik u upravljanju i vožnji čamcem. Obuka je realizirana na rijeci Krivaji pod nadzorom instruktora. Prelijepa rijeka Krivaja je svojim karakteristikama pružila nezaboravne trenutke polaznicima, svojim brzacima ih punila adrenalinom a florom i faunom podsjetila na sve ljepote naše drage Bosne i Hercegovine.



Naravno, sve je proteklo u prelijepom druženju bez, ako se izuzmu modrice, većih povreda. Svi polaznici, njih 9 spasilaca, su uspješno savladali vještinu upravljanja čamcem s veslima. U narednim danima će se nastaviti sa obukom za savladavanje tehnika spašavanja utopljenika i njihovo izvlačenje iz vode. Obuka će se izvesti i za pripadnike profesionalne vatrogasne jedinice Srebrenik.



Prolazeći proces obuke, uočeni su i određeni problemi koje u narednom periodu treba nastojati otklanjati a to su:

- a) Nabaviti spasiocima zaštitnu odjeću i obuću za spašavanje na vodi;
- b) Nabaviti čamac s veslima koji više odgovara karakteristikama brzih rijeka;
- c) Nabaviti prikolicu za prevoz čamca za spašavanje zbog veće mobilnosti;

I ovom prilikom ukazujemo na neprocjenjivu ljepotu Krivaje. Uvjerili smo se da je ona mjesto za odmor i rekreaciju velikog broja građana Bosne i Hercegovine ali i iz inozemstva. Velike količine otpada koje nesavjesni posjetioci ostavljaju iza sebe stvaraju lošu sliku, zagađuju okolinu. Momci iz GSS-a su očistili širi prostor oko kampa od smeća, ali se i tada pojavio dodatni problem: izgleda da smeće niko ne odvozi. Molimo sve posjetioce, ljubitelji prirode to znaju, da iza sebe prostor na kojem borave ostave onakav kakav bi i sami željeli da ga zateknu a da stvoreno smeće odvuču sa sobom.

